

Gahv lahv pyoohf tsawf jurhv durhv, ahv yawxv mahxv zauhf mehv lahf neh jawf, ahv yawxv mahxv urh deh xv jayv deh xv gkawxf ghkawxv mehv chaw lahf urh meh. Ah duuh pooh auhf, auhf lahf urh nehv-ehf, ah duuh ahv yawxv mahxv auhf hah gurh xv shaw urh meh lehf nahf, pooh tsohxf ahv mah ahv dah durhv gahf mahv pahf jyahxf pyurh xv shaw meh. Ahv jayv meehf neh ngah lehf nahf, zauhf oeu hf neh dtah xv layf urh jayv teehv jayv eehv mahxv pahf yah zmmv urh meehf neh meh. Turh bahf dah neh, dzoeuhv mah peehf mah, boeu hf mawv, nyeehf pahv, hurh durhv daw dtawxf, Ahv kahv tsawf jurhv mahv beeh byohxf eehf neeh, teehv zeehf sah f-eeh teehv zeehf, ahv yuuh xv gurh xv-awf neh tawv kah nehv lay xv urh ghkawxv, eehv nauh teehv jayv-eehv mahv poeuhv mahv lawv neeh pyurh xv shaw urh meh. Dzurhf lah xv neh jawf, pooh auhf deh auhf haw peehf urh durhv, pooh auhf deh-auhf dzoeuhv-awf, yawv jayv yawv nah-auhf mmf dauh shahf dauh nehv urh durhv, pooh zahv deh zahv durhv neh, yawv hah urh ahv yuuh xv ahv tsooh lehf cheehv poeuhv tahv urh durhv, hurh durhv auhf, eehv nauh, ah duuh mahxv, lah xv noeuhf toeuhv toeuhv-ehf, naw mahxv yaw lehv yaw chah ngah lehf eehv bahf pahf bpohxf shaw urhv mehv. Dzurhf lah xv neh jawf mmf urh tsahv gahf neh eehv nauh ahv jayv bahf neh yaw lehv yaw chah pyurh xv eehf jeehf urh mahv seehv.

Guuhv lahv sah xv lahf urh dawv dteh xv-ehf mehv lahf urh lay

lehf ehf urh ghkawxv, eehv nauh dzoeuhv mah, peehf mah urh jawf doohv auhf ahv yawxv mahxv auhf dauh lahf awf, ahv yawxv mahxv dzoeuhv mmf loohxv urh meh. Zauhf shuuhxv mehv lahf urh ahf mahxv ahf moohf lahxv hkoeuhf neh teehv durhv nah, bpahxv hkawv goohf tsohxf urh durhv auhf beeh beehv dzeh urh dtehxv-ehf mahv ngurhf, ahv kahv zahv urh yawv nauh nah urhv dehvx jayv dehvx gkawxf, ahv kahv zahv urh dmm rgahv pehf lmmf durhv auhf ghkawxv beeh beehv dzeh mawxv urh meh. Hurh lohvx ehf jauhf loohxv mehv loohxv urh tsahv mahv tsahv ah duuh ah chjuuhxf shahf noeuhv pahv-ehf rgeh urh meh.

Zauhf shuuhxv pahf urh lehf, pehf hkauhv bpohxf lahxf lahxf gahf doohf neeh, ah duuh urh ahv poeuhv lawf gauhv kurhv dzeh-awf, lawf kauhv meehv dzahv auhf kurhv bpuuhxf urh bahf dah neh, kah leeh urh zahv pyurhxv eehf urh meh lehf noeuhv urh tsahv meh lahv? Zauhf mehv lahf urh durhv auhf nahf hahv haw kahf burhf. Ahv yawxv mahxv durhv, nuuh mah shawf dzehxf neeh rgeh-awf, teehv rgahv auhf teehf rgahv, yah rgoeuhf yah gahv urh gahf gkawxf, pyoohf shuuhf auhf nuuh gahv mahv yah auhf urh gahf gkawxf mehv urh lohvx-ehf mmf byauh shahf byauh, mmf chaw shahf chaw loohxv mah lahv lehf? Kah leeh zahv ahf moohf mah auhf dtahxv layf urh bahf dah neh, yawv jayv nah ahv yawf yawxv muuhv jeehf meh lahv. Hurh gahf ahv yawxv mahxv auhf ah duuh nahf hahv pahv-ehf rgeh urh rgawv



myah jay dohxf lahf urh meh.

1.

Sauhv pahv Yayv Soohf ahv teehv rgahv dtehxv gahf neh, ahv jayv urh bahf neh ahv yawxv urh gahf gkawxf mehv loohxv urh tsawf hahv durhv rgawv myah moohf jawf tah?

2.

Jahf leehxv ghkawxv teehv hmmv dtehxv-ehf jyahxf, sauhv pahv Yayv Soohf ghkawxv teehv rgahv dtehxv gahf neh ahv jayv bahf neh, mehv jayv mehv gkawxf teehv moohf neh teehv moohf mahv doohf layf tah.

3.

Turh dtehxv ehf mahxv ngurhf, teehv moohf auhf teehv moohf jah doeuhf urh tsawf hahv, rgoeuhf gahv urh nuuh mah auhf urh tsawf hahv pyurhxv nyah meh lahv. Ahf dzehv-ehf doeuhf urh teehv hmmv ahv, ah duuh ahv kahv zahv auhf, ahv yawxv mahxv urh pyoohf shuuhf bpohxf doohv lehf nuuh mah lahxv hkoeuhf yoohf tahv awf, pyoohf bpohxf loohxv urh durhv meh. Ahv yawxv mahxv auhf hah gurhxv urh, ahv kahv zahv ahf mahxv ahf moohf teehv moohf moohf dohxf nyah urh nahf, hkoeuhf jayv hurh jayv lehf beeh chaw bah urh lehf pyoohf ahv chawv murhv auhf neh shahf meeh-awf, chaw bah urh durhv chaw bah nehv urh

ghkawxv, ahf sahv sahv eehf ngeh, mehv lahf urh durhv dtehxv-ehf nymmf shuuhxv tsohxf dohxf nyah lahf, loh teehv mawf jeehf nahf teehv mawf zurhf dohxf nyah lahf urh dtehxv meh.

Kah leeh zahv pyurhxv urh bahf dah neh, ah duuh urh zauhf auhf beehv dzeh urh dtehxv ehf mahv ngurhf, ah duuh urh tsuuhxv guuh dtahxv urh zahv myauhf ghkawxv mahv pahf myauhf nyah urh tsahv meh lahv? Rgeh nyah nahf ah duuh urh myawv tsoeuhv jeehf yah dmm pahf jeehf urh ngurhf meh lahv? Ahv jayv bahf neh ahv kahv zahv gahv lahv urh myawv tsoeuhv yah dmm pahf jeehf lah? Yah jauh urh jayv beehv dzeh urh dtehxv-ehf mahxv ngurhf, ahv kahv zahv ahv kahv loh xv-ehf mahv doohf layf neeh yah deh xv pahf lah? Ahv kahv leh f pyurhxv urh bahf neh, ahv chawv haw tayv urh jayv pyurhxv hawf, eehfxv bahf nahxv urh jayv pyurhxv ah lahv. Ahv yawxv mahxv urh zauhf beeh hah gurhxv jeehf urh leh f ahv soohf rgahv neh, ahv yawxv hah auhf baohv beehxv urh ah?

Turh bahf dah neh, eehv nauh ah duuh shahf noeuhv duuh duuh pahv-ehf tsahv urh meh. Zauhf shuuhxv turh hmv bahf neh, ahv kahv zahv teehv rgahf teehf rgahv, myahxf pyawv mahv cheehv dtawxv nyah urh gahf gkawxf rgawv myah jayv dohxf lahf urh meh. Zauhf shuuhxv tawv urh durhv yawv hah ahf mahxv ahf moohf leh f moohf-awf, yawv yawv durhv auhf haw

tayv urh nuuh mah teehv byauh auhf lahf urh meh. Yawv hah urh ahf mahxv ahf moohf lahxv hkoeuhf mahv auhf urh durhv auhf ngehv mahv pahf rgeh mawxv urh dtehxv ehf mahv ngurhf, eehv bahf zahv ngah lehf noeuhv awf, haw tayv shaw urh meh Yawv hah auhf yawv hah meehv yehf urh zahv lehf noeuhv huuhv shaw urh meh. Ahv kahv urh zauhf oeuhf ghkohxv mawv tawv loohxv urh durhv auhf, nehxv auhf lawf urh shehf urh tsawf hahv ngah lehf sawf hawf, mahv pahf haw nauhf urh meh. Turh durhv neh mmf urh yaw muuhv jayv ghkawxv, ahv yawxv mahxv urh rgahf doohv yaw doeuhf pyurhxv jeehf shaw urhv meh.

Turh nahxf nahxf ehf noeuhv doeuhf pahv-ehf zauhf mehv urh durhv ahv jyohxf lohxf ehf mehv tahv urh tah? Zauhf shuuhxv mehv loohxv urh durhv ahv deehf ahv mahf ahv kahv urh zauhf ahv jayv ah lehf, seehv doohv awf mehv loohxv meh lahv? Mahv seehv doohv urh gahf yehv bawv ehf ahv chawv auhf yaw doeuhf shah urh nahf, eehv bahf teehv jayv mahv ngurhf ah lahv? Turh bahf dah neh, rgoeuhf urh gahv urh gahf gkawxf auhf mehv urh tsawf hahv, ahv chawv auhf ah chjuuhxf rgawv shahv gahv urh tsahv meh.

Ah duuh ahv kahv zahv bawf tsauhv bawf dauhf jawf-awf pooh tsohxf layxv urh bahf dah neh, ahv gurh jayv jauhf ghkawxv teehv gkawxf lohxv ehf jauhf, teehv gkawxf lohxv ehf mmf, teehv gkawxf

lohv-ehf shahf leh rgeh urh meehf neh nuuh mah teehv gahf dtahv-awf, jawf nyah dzahv nyah urh meh. Tsawf pahv tsawf chah mahv teehv ghkaxf ghkawxv, tsawf jurhv teehv jurhv dtehvxv (smmf meehf ohf urh zahv) meehf neh, ah duuh urh ahv poeuhv ahv bawf durhv, ah duuh ahv kahv tsayf kahv teehv kahv dtehvxv mah leh yawv jawf nah mehv kah layxv urh meh. Turh bahf dah neh ahv chawv urh tsawf jurhv urh yaw kahv auhf, tsawf tayv pyurhxv urh ghkawxv, eehv nauh gkurhxf neeh tsawf jurhv mahv beeh byohxf eehf neeh tawv kah layxv nyah urh meh. Hurh lohv-ehf pyurhxv lahf nyah urh ahv, ah duuh urh ahv poeuhv ahv bawf urh dawv auhf nahf hahv urh bahf dah neh meh. Turh lohv-ehf yawv jawf nah yaw gmm gmm ehf dehvxv layxv urh, eehv nauh zauhf shuuhxv bahf neh, mahv rgoeuh dtawxv nyah neeh pyurhxv eehf urh ahv, mahv tsahv urh jayv meh.

Smmf meehf ohf neh ngahv tsayf tsuuhxv (50) auhf gkurhxf neeh tawv kah layxv urh, ah duuh urh zauhf oeuhf ghkohxv mawv ahv, eehv nauh gahf dauhf mahv tsoeuhv neeh pyurhxv shaw urh meh. Turh lohv-ehf pyurhxv eehf tahv-urh gahf, ah duuh urh ahv poeuhv ahv peehv durhv rgohxv dehvxv lahf awf yah mawf yah gahv, yah seehv nahf, ahf nahxf neeh nuuh mah chjawxf urh mahv seehv jayv meh. Ah duuh ahv, ah duuh urh ahv poeuhv ahv bawf durhv auhf, naw mahxv yaw doeuhf ngah; naw mahxv lohv-ehf bauhv urh ahf gauh mahv jawf ngah leh ehf loohxv

gahf doohf urh meh. Dzurhf lahxv neh jawf, teehv zeehf sahf teehv zeehf, yaw zurh beehxv beehxv ehf lawf dahxf shehf dahxf nehv lahxv urh ahv poeuhv ahv bawf durhv ahv, eehv nauh ahv chawv urh dehv doohv, eehv bahf bpohxf doohv pyurhxv shaw urh meh.

Zauhf sauhf ghkohxv ehf neh jawf, ahv guruh jayv urh zauhf sauhf ghkohxv ghkawxv, ahf yahmv ahf law pahf eehf urh nehv-ehf mahv pahf-eehf urh zauhf sauhf ghkohxv lehf mahv baw urh lohvx-ehf, teehv jayv eehv, eehf bahf dehv lehvx hkahf mahv jyahxf urh zauhf sauhf ghkohxv lehf jeehf mahv jyahxf urh meh. Ahv chawv lahxv buuhv zahv, ahv gahf jawf gkurhxf, ahv jayv urh zauhf tawv pahf, ahf nahxf neeh dehvx dzahv urh ghkawxv, yawv hah urh zauhf, dawv kawv, ahf bohvx mahv beeh byohxf eehf urh rgahf doohv, leh jeh awf dehvx loohxv urh meh. Turh bahf dah neh, ahv chawv urh tsawf jurhv dehvx gahf haw-awf ah duuh urhv zauhf auhf yaw doeuhf ngah lehf dtehxv-ehf mahv ngehv neeh, yaw muuhv ahv guruh jyahxf ngah lehf haw hawf, zmmv dahxf layxv urh tsahv meh, yawv hah urhv ahf jurhv auhf yawv hah mahv haw nauhf, mahv hah guruhxv ngah lehf ahv chawv urh tsawf jurhv neh beeh haw urh mahv tsahv urh jayv meh.

Ah duuh ahv kahv zahv, zauhf shuuhxv tawv loohxv urh durhv auhf haw kahf burhf. Teehv durhv nah, mahf deehf jauh awf hah



gurh xv urh loh xv-ehf zauhf sau hf ghkoh xv byauh byauh neeh
deh xv looh xv urh meh. Hurh durh v ahv, ahv chawv auhf eehf
bahf bpoh xf urh tsawf hahv durh v mahv ngurhf meh. Teehv durh v
nah ahv chawv jauhf meehf jauhf chaw-awf hkoeuhf mahv beeh,
hurh mahv beeh deh xv looh xv urh meh. Teehv durh v nah, zauhf
mahv tawv pahf maw xv ghkaw xv, ah xv yurh xv ahv tsooh durh v
urh meh v nauh chaw chaw urh ghkaw xv ngurhf, pooh lauh seehv
tawv pahf urh meehf neh, yah tawv chaw urh ghkaw xv ngurhf
leh f baw urh meh. Hurh loh xv ehf rgeh urh durh v jawf urh bahf
dah neh, ah duuh ahv kahv zahv, ahv chawv urh pyoohf bpoh xf
doohv ehf nahf mahv bauhv urh meh. Ah duuh ahv kahv zahv,
shahv urh bahf dah neh, ah duuh auhf chaw jaw urh leh f, ahf
mah xv ahf moohf doh xf lah f awf, uuhf chjoo xv bawv law tsoh xv
nehv lah f, oohv doohv tauhv nymmf tsoh xf nehv lah f leh f gahf
gkaw xf rgawv myah jayv auhf chaw bah nehv lah f urh meh. Yaw
myahv ghkoh xv byauh lah f-awf ah duuh ahv kahv zahv durh v
auhf pahf haw ghkoh xv ngeh tee hv jayv eehv mahv pahf eehf
neeh, ahv yaw xv yaw oeuhf loh xv-ehf, shahv looh xv meh. Eh f
ghkaw xv ah duuh auhf chaw bah lah f lay, leh f eh f urh durh v ahv,
deh xv jayv deh xv gkaw xf pahf eehf jeehf awf, deh xv doh xf jeehf
lahf shaw urh v meh. Turh ahv sau hv pahv Yayv Soohf urh ahf
myauhf ooh xv moh xf pyoohf bpoh xf looh xv urh tsawf hahv jawf
urh bahf dah neh meh. Turh bahf dah neh nuuh jauh mahv jyah xf
gahf, ahv chawv neh beeh xv lah xv urh pyoohf shuuhf auhf haw-

awf, zauhf shuuhxv auhf hah gurhxv urh mahv tsahv urh jayv meh.

Ah duuh urh zahv huuhv lahf mauhf lahf awf, ahv chawv urh zahv seehv tsawf gauhf dzaw gurhxv urh lohxxv-ehf, ahv mah ahv dah gurhxv urh durhv, yawv hah urh zahv auhf yawv hahv, ahv kahv zahv urh dehxxv jayv dehxxv gkawxf dzaw nehv pahv-ehf tsahv urh meh. Dzaw nehv pahv-ehf ghkawxxv rgawv myah jyahxf urh meh.

eg. 1.

Ah duuh ahv kahv zahv, tsawf pahv tsawf chah chah neh jawf, zurh baw urh lahxxv hkoeuhf zmmv urh dawv kawv ahv, ahv chawv urh tsawf jurhv dtahxxv ehf myahv dzevv meh. Ahv mah ahv dah neh mahv mehv urh gahf nauhv zahv durhv ahv jyohxf ehf seehv nyah urh.

eg. 2.

Nyeehv gkawxf teevv gkawxf ahv, ah duuh ahv kahv zahv ahv dah ahv mah, tsawf mawv tsawf ghkahxf auhf zurh yah baw duuh duuh urh meh. Turh bahf dah neh, dzahv ngeh dawf ngeh jawf, ahv dah ahv mah, ahv yuuhxxv ahv tsooh durhv mahv dzahv mahv dawf dawxxv urh gahf, zahv goohv durhv mahv dzahv urh meh. Turh lohxxv-ehf mahv rgeh urh durhv auhf, ahv mah ahv dah mahv

mehv mahv tsohxf urh zahv ngah lehf yah dehv urh meh. Nauhv zahv durhv, teehv jayv jayv urh gahf gkawxf auhf neh uuhxv layf nahf, tsawf mawv durhv mahv dawf gahf, dawf dawf-ehf jawf gahf ghkawxv yah mawf urh meh. Dzahv ngeh dawf ngeh ghkawxv tsawf mawv durhv dzahv dawxv dawf dawxv gahf mahv pahf dawv neeh, tsawf mawv durhv ahv, zahv goohv durhv nehv-ehf looh dzahv pahv-ehf rgeh urh meh. Turh ahv ah duuh urh dehxv jayv dehxv gkawxf nehv-ehf mahv tsahv urh teehv jayv meh.

Zauhf shuuhxv mehv urh durhv pooh auhf jawf gkurhxf lahf nahf, pooh tsohxf urh ahv dah ahv mah durhv gahf mahv pahf jyahxf urh lohxv ehf pyurhvxv shaw urh meh. Ahv jayv meehf neh ehf nahf, zauhf shuuhxv pahf eehf urh lohxv-ehf zauhf shuuhxv ghkawxv ahv yawxv hah mehv, yawv nauh nah urh dehxv jayv dehxv gkawxf ghkawxv ahv yawxv hah mehv, pyoohf shuuhf ghkawxv ahv yawxv hah bpohxf lahvxv lehf rgeh meehf neh, ahv yawxv mahxv durhv ahv pooh ahv dah ahv mah durhv nahxf mahv tsayf, baohv auhf urh tsawf hahv pyurhvxv lahf shaw hawf neh, ahv gurrh jayv urh gahf gkawxf auhf ghkawxv, ahv yawxv mahxv urh kuuhf zahf lahvxv zahf pyurhvxv jeehf shaw urh meh. Ah lawxf lawxf ehf, ahv yawxv hah urh mahv yah mmf mahv yah shahf urh zauhf shuuhxv neh bpahxv dtawxv jeehf shaw urhv meh. Ah lawxf lawxf ehf ahv yawxv mahxv durhv yahf hkahv

dahf urh tsawf hahv pyurh xv lah f-awf, zauhf nyeh xv teh v urh tsawf hahv pyurh xv lah f leh f mahv noeuhv gahf ahf mah xv ahf moohf hkoeuhf moohf urh lah xv hkoeuhf dzoeuhv mmf urh sauhv pahv zahv tee hv rgahv pyurh xv lah f awf, ahv yaw xv hah neh lah xv noeuhf hkahf toeuhv urh jayv hkahf pyurh xv pyurh xv shaw urh meh.

Ah duuh ahv kahv zahv, zauhf jauhf neh jawf, jeehf bahv neh mahv ngurhf nahf zauhf mahv dayv nyah urh meh. Jeehf bahv jeehf seehv neh dteh xv-ehf zauhf yah dayv meh. Gahf ghkawxf tee hv jayv jayv dohx f lah f-awf, yahf hkahv yah jah neh ghkaw xv muuhv, meehv zahv lah v smmf meehf eehf urh gahf ghkawxf auhf neh, dawv ngeh v chawv layf neh ghkaw xv muuhv, tsawf mawv tsawf ghkahxf hawv jay shahf gahf ghkaw xv muuhv, jeehf bahv neh yah bpah xv dtaw xv jeehf urh meh. Dzahv yeh xv dawf bohxf nahf yaw doeuhf ngah leh f meh v urh mahv ngurhf nahf, jeehf bahv zmmv urh yaw doeuhf ah leh f, ah duuh ahv poeuhv ahv bawf meh v urh mahv jyahxf meh. Eehv nauh kah leeh zahv ahf moohf dohx f lah f-awf, jeehf bahv mahv yah dawf mahv yah zmmv ah leh f nyeh xv tsee hv duuh duuh urh meh. Meehv yehf urh dawv kawv meh v urh dteh xv-ehf mahv ngurhf, gahv lah v pyoohf urh zauhf jeehf meh v chaw gahf neh, ahv gahf neh urh ahv jayv rgeh meehf, jeehf bahv dawf urh turh hmv auhf deehv seh xv maw xv urh mahv seehv. Gahv lah v pyoohf durh v ghkaw xv, ahv yaw xv

mahxv meehf hkauhv ahv, yaw chjehxv meehf neh, rgawf mawf beeh lmmf urh rgahf doohv, jeehf bahv ah chjuuhxf chjuuhxf mahv dawf mahv gurhxv nyah urh meh. Jahf leehxv lahxv hkoeuhf ghkawxv, jeehf bahv ahv, eehv sahv layv lahf tsawf jurhv urh rgahf doohv zauhf lay urh teehv jayv meh. Yaw muuhf ehf pahf shahf noeuhv ghkohxv haw nahf, ah duuh ahv kahv zahv urh dehxv jayv dehxv gkawxf nehv-ehf mahv beeh doohf layf urh rgahf doohv, jauhf dohxf tahv urh zauhf mahv seehv lehf ghkawxv noeuhv pahv-ehf rgeh urh meh.

Turh bahf dah neh, meehv yehf urh guuhv lau hv sahx lahf dawv mehv lahf neh jawf, yaw muuhv hehf lahxv nehv urh loh xv-ehf, yaw doeuhf jayv ghkawxv hehf lahxv nehv urh ngah hehf nahf mahv bauhv urh meh. Ah duuh ahv kahv zahv auhf beeh rgawv beeh bpahxf eehf urh jayv, mehv auhf lahxv nahf, mahv hah gurhxv urh tsahv dzehv meh. Ah duuh ahv, ahv chawv urh pyoohf bpohxf doohv pyurhxv eehf nahf ghkawxv, shahf noeuhv awf deh xv pahf pahv-ehf rgeh urh meh. Zauhf shuuhxv tawv pahf urh ghkawxv, ah duuh urh sheehv mahv pahf eehf nyah urh bahf dah neh ahv kahv zahv ahv, ahv kahv zahv meh. Turh bahf dah neh, ah duuh mehf nmmf durhv, tsawf jurhv mahv beeh byohxf eehf urh rgahf doohv, dawv kawv mahv beeh byohxf eehf urh rgahf doohv, ah duuh urh deh xv jayv deh xv gkawxf gohf dahxf lahf urh rgahf doohv, leh jeh dahxf lay xv kahf burhf.

Chapter 13

Dawv Chahf Chahf Dawv (Two Old Classical Songs)

Muuhf Choehv Ahv Nmmf Shahv Urh:

Dah law nyeehf nehv tsurhxf lah zahv nmmf.

Mah law nyeehf neh tsurhxf-urh moohf choehv.

Mah law bawf hkauhf mahv rgeh ahv zahv.

Mah law lahxv rgohxv zahxv pauhv nuuh choehf yaw nyah.

Dah law bawf hkauhf mahv rgehxv ahv zahv.

Dah law bawf hkauhf zahv nauh hawv rgohv yaw nyah.

Dah law nyeehf nehv tsurhxf lah zahv nmmf.

Mah law nyeehf neh tsurhxf-urh moohf choehv.

Mah neh teehv tsurhxf tsurhxf-awf.


Gahf ohxf ahf lehv bawv nyah tsurhxf ahf

Dah neh teehv tsurhxf tsurhxf-awf

Gahf dtahxf ahf chehf doohv nyah tsurhxf churhv.

Gahf ohxf hoh bahv mah auhf mah lehv koohf-awf.

Gahf dtahxf hoh dauhf dah auhf dah lawv koohf-awf.



Gahf ohxf hoh bahv ahv mah ahv choeuhf dawf-awf.
Gahf dtahxf hoh dauhf ahv dah hawv rgohv dzahv-awf.

Hoh bahv mah auhf gkahxf burhxf mahv mmf mawxv nyah.
Hoh dauhf dah auhf gkahxf burhxf mahv mawv mawxv nyah.

Lawf jeehf yaw shahv teehv rgahv zahv ngeh.
Zahv nyeeh tsawf shahv sheehf-awf, lmmv bymmf mahv baw.
Deh mah nyohv yauhf sheehf awf.
Shahv poeuhv mahv baw loohxv nyah.

Lawf jeehf yaw shahv teehv rgahv zahv ngeh.
Hoohv shahv nauhv bah sah law nahf.
Ahf hooch mahv shahv zahf nah.
Teehv shurhf doohf lay, dteh xv ah, lehfv noeuhv nyah.

Hoohv meh xv nauhv bah bohxf law nahf.
Ahf hooch mahv meh xv zahf nah.
Teehv shurhf doohf lay dteh xv ah lehfv noeuhv nyah.

Hoohv meh xv nauhv bah bohxf law nahf.
Ahf hooch mahv meh xv zahf nah.
Teehv shurhf doohf lay dteh xv ah lehfv noeuhv nyah.

Dah law nyeehf nehv tsurhxf-urh zahv gah zahv ngeh.

Mah law nyeehf neh tsurhxf urh moohf choeuhv.

Yah choeuhv dzayf bpohxf mahv tseeh-ahf lehf noeuhv nyah.

Moohf choeuh ahv nmmf neh xv bpohxf mahv seh xv lay xv-ahf lehf noeuhv nyah.

Yah choeuhv shahv meehf, chehf byahxf mmf urh mahv jawf

Moohf choeuh ahv nmmf shahv meehf, hawv beeh xv mmf urh.

Mahv jawf nyah lehf noeuhv nyah.

Dawv guuh ahv uuhv dah-auhf dah lehf koohf-awf.

Dawv nyah ahv hkohv mah auhf.

Mah lehf koohf urh mah lehf noeuhv nyah.

Ahv uuhv dah-auhf dah lehf mahv koohf burhf lehf gahv ngeh.

Bawf tsauhv bawf dauhf

Hkahv tsehxf cheehf hahv pyurh xv eehf looh xv nyah.

Ahv chaw smmv tsayf zahv yoh gauhv-jahv mawv-awf.

Shahv tayf hkoeuhf dtahxf.

Shahv chjah xv shahv nmmxf nmmxf law oohf jahf noeuhv nyah.

Dawv nyah ahv hkohv mah-auhf

Mah lehf mahv koohf burhf lehf gahv ngeh.

Bawf tsauhv bawf dauhf lauhv zahxf.

Kuuhf gurh xv pyurh xv rgah lay xv-awf.

Ahv chaw smmv tsayf zahv yoh, gkahxf jahv mawv-awf.

Hkawv dtah xv oohv mohxf shahv gkohxf gkohxf-awf.

Zahv nmmf nauh lohxf, hawv tsehv gurh xv law-oohf jahf noeuhv nyah.

Dah law nyeehf nehv tsurhxf lah zahv nmmf.

Mah law tsurhxf lah moohf choeuhv zahv ngeh.

Tsawf dteehxf ahv tayv bahf neh.

Tsawf yahf ahv kahf yoh lay dteh xv ah.

Tsawf dteehxf ahv tayv bahf neh, tsawf yahf yoh ngeh.

Pooh lauhf nahv ngurhv dzoeuhv sawf pee hf neh mahv pahf.

Yah choeuhv teehv mawf bahf neh yah pauhv byauh lay looh xv-ooh.

Ahv chaw soohf gahv nyohv mah choeuhf yauhf mawf neh mah xv pahf.

Tsawf yehxf bpohxf awf, ooh xv dtah xv ahv kahf byauh lay looh xv-ooh.

Jayv yehf bpohxf awf, lawf kahv ahv kahf byauh lay looh xv ooh.

Zahv Dahxv Meehv Dahxv-auhf Chahf Haw-urh Dawv:

Jawf lah lah jahv mmv dtahxf sahff lehxf tsehv ngeh.

Pooh dtahxf zahv nyeehv zauhf shahf bah lah.

Yoh loh hkahv jeehf jayv shahf yahmv dohxf ngeh.

Zahv meehv baw urh ahv mah ngoeuhf beehf dzurhf.

Zahv yoh baw urh ahv dah uuhf zahv surhxv urh.

Teehv lahf dohxf lay meehf ah.

Meehv yahxv zauhf shahf bah lah dohxf ngeh.

Rgoeuhv tsohxv lohxf-urh meehv lohff.

Zauhf shahf lohxf urh meehv nmmv zahv ngeh.

Ahv duuh sahff mahv mahv baw seehv hkoeuhf.

Rgoeuhf tsohxv yawv pyehxf yawv kahf.

Zauhf shahf yawv pyehxf yawv chawv haw eehf burhf.

Rgoeuhf tsohxv yawv pyehxf kahf auhf mahv haw.

Zauhf shahf yawv pyehxf yawv chawv mahv haw.

Rgoeuhf tsohxv eehf lehff dahff mah mahv hkehff.

Zauhf shahf eehf lehff dahff mah mahv mehff.

Rgoeuhf tsohxv yawv pyehxf kahf auhf mahv haw.

Zauhf shahf yawv pyehxf yawv chawv mahv haw.

Rgoeuhf tsohxv myah-awf, chehf law mahv mahf.

Zauhf shahf myah-awf, zahv law mahv deh xv.

Zauhf shahf teehv tsuuhxf huuhv-awf.

Zahv baw zahv yoohf.

Tsayf tsuuhxf yahf tsuuhxf huuhv eehf ah jayf.

Yuuhxv tsooh tayf tsuuhxv kahv-auhf, zahv nmmf dzauhf ngeh.

Dah mah tsayf pyehxf kahv auhf nmmf zahv jahv ngeh.

Yuuhxv tsooh hmmv muuhv, tsayf shehxf yahf shehxf jyahxf meehf.

Mahv muuhv hmmv-eeh mahv dmm layxv-urh ngahf.

Dah mah dzahf kuuhf, tsayf hkmm yahf hkmmv jyahxf meehf.

Mahv kuuhf hkmmv-eeh mahv dzahv layxv-urh ngahf.

Mahv eehf zahv meehv, hkawv rgoeuh nymmf-auhf jawf ngeh.

Mahv eehf meehv loh f hkawv rgoeuh nymmf kahv tsawv ngeh.

Mahv jahv bahv-eehf mahv shurh mah leh f.

Mahv lmmf buuh-auhf.

Mahv yoohxv layxv urh mah leh f noeuhv nyah loh f.

Bahv tsayf bahv muuhv hkehv-auhf tsayf shurh mmf.

Deh tsayf deh muuh hkehv auhf, tsayf tseh v mmf ngeh.



Nuuh noeuhv loh xv-ehf hkahf shahf zah-awf.

Myahxf mawf loh xv ehf.

Hkahf tsahv oh xv-urh mah lehf noeuhv nyah loh f.

Chjeeh xv law bahv shurhv, smmf muuh hkahv jeehf.

Nauh loh zauhf shahf.

Smmf muuh zahv doohv chah-urh mah lehf noeuhv nyah loh f.

Choeuhv zahv dah-auhf zauhf law mahv shahf.

Lawf choehf neeh auhf, meehv law mahv ghkeh xv.

Choeuhv zahv dah auhf zauhf law shahf ngeh.

Choeuhv bahv yehf neh kah tsawf ngah lehf.

Lawf choehf neeh-auhf meehv lawv ghkeh xv ngeh.

Lawf choehf yehf neh kah rgoh xv ngah lehf.

Choeuhv zahv bahv-auhf bahv lehf mahv rgoeuh.

Lawf choehf neeh auhf meehv lawv mahv rgoeuh mah loh f.

Yoh mawxf loh xf-ehf meehv-eehv maw xv law nmmf.

Choeuhv zahv dah auhf zauhf law shahf ngeh.

Choeuhv lay choehv jayv zah xv mah teehv mawf.

Mahv chooh law-urh mahv ngurhf.

Choeuhv lay choehv jayv zah xv mah teehv mawf chooh ngeh.

Zah xv mah mawf ngeh choehv lau hv mahv kah lay xv-ehf.

Nyeehv rgah jayv chooh mehv nauh, guuhv lauhv gkurhxf law nahf.

Zahxv mah teehv mawf bahf neh choeuhv gahv bpohxf-awf.

Ahv chaw smmf muuhv nyohv mah mawf neh mahv pahf.

Yoh yah loh xv-ehf meehv-eehv yah law nahf.

Choeuhv zahv dah-auhf rgoeuhf lawv tsohxv ngeh.

Choeuhv lay choeuhv yahf lawf taw teehv kawv mmf-awf.

Lawf taw kawv neh, choeuhv lauhv mahv kah lay xv-ehf.

Nyeehv rgah yahf mmf mehv nauh, guuhv lauhv gkurhxf law nahf.

Lawf taw kawv neh, shooh xv meh xv bohxf-ah jayf.

Lawf taw kawv neh shooh xv meh xv bohxf awf.

Ahv chmm deh rgauhf lawv mah buuhf jawv kawv neh mahv pahf.

Choeuhv zahv bahv-auhf bahv leh f mahv rgoeuh mahf-eehv.

Poeuhv nehv shahf lah jayv oeuhf.

Dah neh shahf lah jayv shuuh xv chah-urh lay loh f.

Poeuhv nehv shahf lah jayv oeuhf chah ngeh.

Jayv jyahxf ahv zahf meehv nmm lah f shawv seehv-awf.

Jayv eehf ahv zahf meehf nmm mahv seehv lay xv ngeh.

Shahf mah meehv nmmv jayv dzah peehf surhf noh-ah jayf.

Poeuhv nehv shahf lah jayv oeuhf mahv chah.

Dah neh shahf lah jayv shuuhxv mahv chah layxv-ehf.

Nyeehv rgahv mawxv-urh ahv tsawf chah ngeh.

Nyeehv rgahv mawxv meehf zauhf law shahf awf.

Mahv zmm jayv muuhv behxf dauh mahv cheehf.

Hkahf zmm jayv muuhv behxf hkeh cheehf-awf.

Yawv shahf law nmmf, yawv jayv zmmv layf dtehxv-ah.

Peehf neh mmf lah hmmv oeuhf mahv chah.

Mah neh mmf lah hmm shuuhxv mahv chah layxv-ehf.

Nyeehv mawf mawxv-urh mawv nyohv chahv ngeh.

Nyeehv mawf mawxv meehf rgoeuhf lawv tsohxv ngeh.

Mahv dmm hmmv muuhv toohf dauh mahv cheehf.

Hkahf dmm hmmv muuhv toohf hkeh cheehf-awf.

Yawv mmf lawv-urh yawv hmm dmm layf dtehxv ah.

Kawf chjeehxf dzeehv mauhv sauhf-urh zahv lehfv.

Lahxv nahxf pyoohf goohf sauhf urh zahv doohv.

Chah-urh jayv mahf-eehv.

Kawf chjeehxf dzeehv mauhv shauhf meehf zauhf law shahf ngeh.

Kuuhf neh mahv zohv gahf dahxf hkoeuhf mauhf.

Lehxf leh ngurhf eehv.

Kawf chjeehxf dzeehv mauhv yahf law mahv mmf.

Nyeehv rgah mahv mmf yahf mah, kawv muuhv mahv dohxf ah
jayf.

Lahxv nahxf pyoohf goohf sauhf meehf, rgoeuhf lawv tsoh xv ngeh.

Nyeehv rgah mahv mmf yahf mah kawv muuhv dohxf-awf.

Lahxv nahxf pyoohf goohf zahv law mahv pyurh xv lay xv-ahf.

Choeuhv zahv dah-auhf zauhf shahf dzauhf ngeh.

Hkawv rgoeuh nahv tsee hf tsee hf gahxf tee hv dzooh xv.

Sauhv pah lah xv oh xv jayv dohxf dauhv-auhf.

Eehf gahf goohxf nyah loh f.

Smmf muuhv zahv meehv nymmf rgauhf jawf meehf.

Ohxf hkeh lah xv hehf tsauhf dohxf mahv chjeeh xv meehf ah.

Smmf muuh zahv meehv mahv lah f dawv neh moohf ngeh.

Dawv neh muuhf sah f smmf muuh zahv meehv mahv lah f.

Smmf muuh zahv meehv dawv moohf yaw ghkahxf meehf-ah.

Deh mah boeuhv joohv mahv lah f kahf neh shurh ngeh.

Deh mah boeuhv joohv kauhf shurh yaw mauhf meehf-ah.

Tmmv dauh ngahv shuuhf mahv lah f auhf nehv surhv ngeh.

Tmmv dauh ngahv shuuhf auhf surh yaw yahxv meehf-ah.

Deh mah mawv nyohxv mahv lahf sahv neh moohf.

Deh mah mauhv kawf mahv lahf chehf nehv jahv ngeh.

Deh mah mawv nyohv mahv lahf.

Sahv neh moohf-awf mahv lahf-urh mahf-eehv.

Sauhv durhvxv mahv ngurhf loh boohf ngah loh.

Sahv durhvxv mahv ngurhf-urh loh boohf mahf-eehv.

Pyoohf sahxf lawv leehf zahv dooh jyohxv lehv chjawxf-awf.

Lahxv buuhv dauhv-auhf sahv tsayf rgmm ngeh.

Sahv jyahxf-ahv zahf yaw dooh mahv seehv layxv nyah.

Sahv jyahxf ahv zahf meehv nmm yaw doohv mehv lay.

Deh mah mauhv kawf mahv lahf chehf nehv.

Jahv neh mahv lahf-urh mahf-eehv.

Mauhv chehf mahv ngurhf-urh hkahf shuuhxv ngah loh.

Mauhv chehf mahv ngurhf urh hkahf shuuhxv mahf eehv.

Pyoohf guuhv lahxv dtoohxf hkoeuhf lauhf cheehf-awf.

Ahv chmmv dauhv-auhf chehf tsayf rgmm ngeh.

Chehf jyahxf ahv zahf yaw dooh mahv seehv layxv nyah.

Chehf jyahxf ahv zahf meehv nmm yaw doohv mehv lay.

Mahv ohxv bahv-ehf smmv meehf shurh-awf.

Mahv lmmf buuh-ehf ahv buuh smmf chjeehxv yoohxv-awf.

Dahf mahv mahv mawf hkoeuhv mmf tmmf ngeh.

Dahf mah mahv mawf ahv dooh hkoeuhv dawv bawv ngeh.

Nyeehv rgahv mawxv urh ahv tsawf dohxf law nahf.

Nyeehv mawf mawxv urh mawv nyohv dohxf law nahf.

Kahf lahf nyeehv dzoeuhv dahf mah ahv kahf kah ngeh.

Rgohxv law mauhf dzauhf yuuhxv tsooh ahv rgohxv rgohxv ngeh.

Dah mah kahf dawv nahf dzeh mahv rgeh layxv-ehf.

Dah mah kahf dawv hawv dzahv teehv byawf nahf-awf.

Oh bahv dzurhf-awf yawv shurh bahv tayf.

Oh hkmmf dzurhf-awf, yawv shurh bahv dawv joohv lay.

Dahf mah kahf dawv nahf dzeh rgeh burhf gahv ngeh.

Nyeehv dzoeuhf dahf mahv guuhv lau hv yaw dzauhf-ah jayf.

Kahf lahf nyeehv dzoeuhv dahf mah ahv kahf kah ngeh.

Mahv lohxf meehv nmmv dahf mah kahf jawf mmf lehf ngurhf-
eehv.

Tahv eehf meehv nmmv dahf mah mahv kahf layxv-ahf.

Rgohxv law mauhf dzauhf yuuhxv tsooh ahv rgohxv rgohxv ngeh.

Mahv lohxf meehv loh f.



Yuuhxv tsooh ahv rgohxv dohxf lehf ngurhf-eehv.

Tahv eehf meehv lohf yuuhxv tsooh mahv rgohxv layxv-ahf.

Teehv rgah zahv meehv mahv lohxf nyeehv tsayf.

Nyeehv tsayf nuuh paw dawf mahv mahv kahf-ahf.

Yoh mawxf loh xv-ehf meehv-eehv mawxv law nahf.

Yoh yah loh xv-ehf meehv-eehv yah law nahf.

Meehv yah rgoeuhf tsohxv mahv lohxf dawv nauh lohxf.

Zauhf shahf mahv lohxf dawv nauhv loh xv urh meh.

Chapter 14

Nymmf Tsohxf Jeehf Shahf

(Ballads)

Jawf lah lah jahv, mmv dtahxf sah f lehxf tsehv lay awf',
Jawf lah hkahv leh f, mmv nahxf goohf deehv soh lay awf'
Tauhf lah mmv pyoohf jeehf rgoh nauhf kawv mmf urh.
Jeehf hkeh hawv burhv lah xv neh dtawxf awf'.

Tauhf lah lah jahv dmmf guuh gah awf'
Rgoh lah mah auhf' teehv seehv tseh xv lay meehf ah.
Pahv muuh mahv baw zahv sauhf mmf
Mauhf muuh mahv baw nmmf dauhv tayv awf'

Mauhf dzauhf dzauhf duuh mahv gkurhxf ahf' ahv.
Oeuhf muuhv zahv rgah mmf urh, ahv lah f gkurhxf lay awf'
Zah xv puuhf dauhf dooh mahv seehv ahf' ahv.
Dawv peh zah xv loh v rgoh gah yawxf urh
Ahv lah f dohxf ngeh.

Ghkoh xv muuh nauh tsayf tsehv lah f awf'
Nauh muuhv seehv yehxf ghkawxf lah f awf' neh.
Hkurhf lawv hkahv bah ahv kurhf dtah xv lay awf'

Pyoohf shuuhf ahv hkurhf zurhf dooh mahv zeehxv
Hkavh bah ahv hkurhf zurhf doohv zeehxv lay jayf.

Hkmmv mah chehf shuuhf hawv nyawv rgeh awf.
Hawv nyawv mehf chehf ahf yehxf
Yah oohxf mehf dteehxf ahv seehv rgeh awf'

Meehf mahv hkauhv eeh mahv dauhf, tsehv hehf dzohxf awf'
Tsayf nyeehxv zahv yoh, zurhf lauhf dauhf awf'
Smmv tsayf zahv yoh zurhf jahv kah awf'.

Zurhf law hkoeuhf dtahxf hahf lawv jyahxf
Zurhf law hkoeuhf dtahxf yurh xv lawv jyahxf
Yurh xv law hkoeuhf dtahxf hahf lawv jyahxf
Yurh xv law hkoeuhf dtahxf kurhv lawv jyahxf
Kurhv law hkoeuhf dtahxf hahf lawv jyahxf

Kurhv law hkoeuhf dtahxf dzawxf lawv jyahxf.
Dzawxf law hkoeuhf dtahxf hahf lawv jyahxf
Dzawxf law hkoeuhf dtahxf dmmv lawv jyahxf
Dmmv law hkoeuhf dtahxf hahf lawv jyahxf

Dmmv law hkoeuhf dtahxf behxf lawv jyahxf
Behxf law hkoeuhf dtahxf hahf lawv jyahxf

Behxf law hkoeuhf dtahxf nyoeuhf lawv jyahxf
Nyoeuhf law hkoeuhf dtahxf hahf lawv jyahxf

Nyoeuhf law hkoeuhf dtahxf eehv lehv jyahxf
Dah neh eehv lehv smmv pyehxf jehf jehf jyahxf awf'
Dah neh nymmf nyoeuhf smmf kauh gkahxv yahxv jyahxf awf'
Hkawf dawv smmv lmmf beehf tsehxf jyahxf awf'

Teehv rgah nymmf mah tsohxf awf', teehv pooh moohf choeuhv
beeh lmmf
Teehv rgah yahf mah mmf awf'
Teehv pooh hawv meh xv beeh dehxf lay law.

Teehv nymmf mah auhf, tsawf lawv smmv shehxf yoh ngeh,
Pyahv dmmv sheehxv tsayf sheehxv lawxf
Sheehxv yoh hkahv jeehf dzauh jahv shawv ehf'
Nymmf mah sheehxv tsayf sheehxv kahv
Sheehxv meehv mmv tahf durh ehf'

Teehv nymmf mah auhf tsawf lawv smmv shehxf yoh rgeh mahv
dayf
Nymmf dzayf nymmf taw, nymmf zahv tsohxf ehf'
Teehv gkoohxf mah auhf jayv muuhv smmv shehxf yoh ehf



Teehv gkoohxf mah auhf smmv shehxf jayv muuhv yoh rgeh mahv dayf.

Gkoohxf dzayf kooohxf taw, gkoohxf zahv tsohxf ehf.

Pyahv urh mahv mawf, nahf urh mahv seehv neeh

Yooohxv muuhv jawf sahf beeh dohxf law.

(Zahv meehv zahv shurhv urh shahv zeehxf zeehxf urh dawv)

Dawv Deh Rgah Eehf Urh:

Rgoeuhf tsohvx tsayf smmf ahv lahf

Zauhf shahf tsayf ngah ahv ghkohxv ghkawxf lahf awf'

Zauhf mahv mahv shahf ahv, yawv jawf mahv sahf

Zauhf mah mahv shahf ahv, yawv yooohxf mahv tmmv nyah lehf

Ahv mauhf zahv doohv deh rgah rgoh nauh dohxf eehf ahv lehf jyahxf nyah.

Mah neh mmf hmmv smmv pyehxf nymmf चाह.

Dah neh jayv shahf lauhf dauh kauhv jahv rgeh awf.

Myahxf pyawv sheehv nayf lawv hurh.

Nahf hurh ahv guuhf ghkohxv jahv rgeh awf'

Dtawxf dauhv gurhvx poeuhf nyoeuhf hkauh, dtawxf mah smmv

tohf.

Bahxv pooh sahfv nyahv churhv awf

Oohv dzauhv nahv bpahxv dzayf jeehf ahv dauhf

Oohv dzauhv dzauhv hkauhf jah deh tsahv tseehv.

Lawf jeehf nahv lahxv oohv dooh yehxf tsayf tsawxf awf'

Lawf jeehf zahv doohv deh rgah rgoh nauh dohxf eehf

Ahv lehf rgeh ngeh.

Ahv dah tahv eehf ahv dah, tahv eehf ahv dah

Lahxv taw mahv jurhv law urh mahv ngurhf

Tahv eehf ahv dah, lahxv tawv jurhv ngeh.

Lawf jeehf lahxv dauhv smm tohf

Rgurh nauh bpahxf auhf mahxv goohxf

Lahxv kuuhf smmv tohf rgurh nauhv chehv auhf

Mahv goohxf urh mah.

Ahv mah tahv eehf Ahv mah, tahv eehf ahv mah

Pehf taw mahv jurhv law urh mahv ngurhf

Tahv eehf ahv mah pehf tawv jurhv ngeh

Lawf jeehf pehf dauhv smmv tohf

Rgeh nauh bpahxf auhf mahx goohxf

Pehf dzayf smmv tohf rgurh nauhv chehv auhf mahv goohxf urh

mah.

Mah neh mmf hmmv smmv pyehxf nymmf चाहf rgeh awf
Sauhv taw gurh xv pyurh xv gahxf nah teehv shurhf doohf ehf
Dah neh jayv shahf, lauhf dauh hkauhv jahv rgeh awf
Sauhv taw mehf chehf ah looh yehxf jahv.
Poohv nah teehv shurhf doohf ehf
Ahv mauhf zahv doohv deh rgah rgoh nauh dohxf eehf lah

Teehv kahv mah lehf kahv dohxf eehf ngeh.
Pooh dtah xv rgoeuhv dzoeuhv tsayf peehf
Pooh lauhf rgoeuhv dzoeuhv tsawf mawv
Ahv chawv smmv tsayf jayv bpahxf kahf
Hkawv dauhv auhf dohxf lay meehf ah.

Nyeehv kahv mah lehf kahv dohxf ehf ngeh
Meehv choeuhv shahv pyahxf mahv nyah
Shahv yoeuhv lah xv neh murhf ehf
Shahv nayf lah xv neh tsurhxf ehf
Jawf urh kahv lehf dohxf layf meehf ah.

Smmf kahv mah lehf kahv dohxf eehf ngeh
Byauhf dauhv chehf yahf mahv nyah.
Puuhv seehxf sah xv neh shawf ehf jawf
Puuhv nmmxf mahv shawf ahv
Sah xv nehv baw ehf jawf urh kahv lehf dohxf lay meehf ah.

Dzauh huuhv tehv tauhf dohxf rgoh hkehv auhf

Yawv pooh lawf kauhv hkahv lah

Ahv guuhf, yawv pooh dahf lehf

Shmmf doeuh myahxf jawv dohxf lay meehf ah

Yawv pooh lawf kauhv hkahv lah ahv guuhf

Yawv pooh dahf lehf shmmf doeuh myahxf jawv dzurhf awf.

Chapter 15

Ahv Kahv Urh Tsuuhxv Dtahxv

(Akha Geneologies)

Beeh Noeuhv Haw Urh Dawv Kawv

(Preface)

Ah duuh ahv kahv zahv, Lahxv Buuhv urh meehf hkauhv auhf
Lahxv Buuhv nehv-ehf teehv gkawxf lohxxv-ehf jawf mah leh
tsahv urh ghkawxv ah duuh urh tsuuhxv hawf, Lahxv Buuhv
urh tsuuhxv auhf cheehv chjehxf haw neh, lahxxv buuhv urh
tsuuhxv durhv ahv ah duuh urh tsuuhxv durhv dtahxxv-ehf, 100
tsuuhxv ehf rgahv neeh myahv dzevh gahf yah mawf urh meh.
Ahv jayv meehf neh turh lohxxv ehf pyurhxxv tah? Ah duuh ahv
kahv urh tsuuhxv mauhf dzevh dzevh urh durhv, (60) tsuuhxv
dzevh urh dtehxv ah; ehf' ghkawxv ahv yawxxv mahxxv urh tsuuhxv
ahv, (140) dzevh layf shaw urh ngahf.

Ah duuh ahv kahv surh lay urhv, ahv chawv tsawf jurhv urh
mehv nauh meehf neh ah lahv. Pyurhxxv nyah urh teehv jayv
ahv, ah duuh ahv kahv, tsawf tayv zahv meehf, bawf tsauhv bawf
dauhf auhf ahf mahxxv ahf moohf moohf hawf, teehv gahf neh
teehv gahf chjehxf chjehxf-ehf jawf urh tsawf jurhv meh. Hkoeuhf

meehf neh, ahv chawv, murhv tayv nyah, zauhf baw lahf, ahv jayv baw lahf urh ghkawxv mahv baw lahf nyah neeh, mehv nauh gah yahxv urh gahf doohf urh meh. Mehv nauh, ahv chawv auhf guuhf mahv mmf rgahv nyah-ehf”, ahv chawv neh oohxf lauhf tahv urh oohxv mohxf jawf lay hawf, ahv chawv urh ghkohxv dtohxv lah dtohxv auhf hah gurhxv urh gahf doohf urh ngah.

Ah durh urhv tsuuhxv guuh gahf pahf haw ghkohxv kahf burhf. Gahf hooH Teehf Behf (Tibet) meehf hkauhv auhf jawf ngeh, Mahm tsawf jurhv nehv-ehf yah jawf dtahxv haw urh meh. Mahm sauhv pahv urh ahf myauhf durhv jeehf ah duuh tsuuhxv guuh urh loh xv-ehf”, ahf myauhf teehv myauhf auhf, tayf sah f smmf hmm dohxf hawf, ahv hooH urh ahf myauhf neh mehv nauh urh tayf sah f nyeehv sah f hkoeuhf, yawv yawv myauhf urh ahv hooH tayf sah f nyeehv sah f pahf pyurhxv lay urhv meh.

e.g. Smmf Meehf Ohf
Ohf Toeuhv Loeuh
Toeuhv Loeuh Dzmm
Dzmm Mawv Yehf
Mawv Yehf Chah
Chah Teehv Seehv
Teehv Seehv Leehf
Leehf Pawv Behxf



Pawv Behxf Oohxf
Oohxf Nyohv Zahv
Nyohv Zahv Tsawf
Tsawf Mawv Oeuhf
Mawv Oeuhf Dzoehv
Dzoehv Tauhv Pauhv
Tauhv Pauhv Mauhf
Mauhf Hawv Tauh
Hawv Tauh Jayv.....
Lahxv Tauhf Boeuhv
Tauhf Boeuhv Soeuhxf
Boeuhv Soeuhxf Lehxf

Tsawf myauhf hurh durhv auhf haw nahf, teeh rgahv rgahv neh yaw muuhv ehf shahf noeuhv hawf boh xv dohxf nehv tahv urh gahf doohf urh meh. Teehv lah xv mah jeehf pyahv dohxf eehf urh mahv pahf baw meehf shahf noeuhv duuh duuh pahv-ehf tsahv urh meh. Smmf meehf ohf neh lah xv dtahxf tsehxf durhv ahv, ahv yaw xv mah xv, teehv jayv leh f pahf guuh urh meehf neh, lah xv buuhv sauhv pahv urh tsawf myauhf durhv ghkaw xv pyurh xv nyah, mahv ngurhf nahf, ah duuh ahv kahv zahv urh ahf moohf ahv yuuh xv durhv urh tsawf myauhf ghkaw xv pyurh xv nyah urh meh.

Boeuh soeuhxf lehxf auhf neh rgawv eehf urh durhv ahv mahf deehf tsawf hahv urh tsawf myauhf ngahf lehf, ahf myauhf durhv auhf haw hawf neh ehf nyah lahf urh meh. Hurh gahf, mah zurhxf goohv durhv, lahv dtahxf tsehxf auhf, ahf myahf teehv rgahv teehv jayv guuh loohxv meh. Ahv guruh durhv mahf dzehv urh mahv seehv. Beeh tsayf mmf urh rgahf doohv hurh gahf boh xv dohxf tahv nehv urh mah.

e.g.

Zurhxf Chjehxv

1. Lehxf Lahf Tseehf
2. Tseehf Lahf Neh
3. Neh Sawv Mah
4. Sawv Mah Zurhxf
5. Zurhxf Chjehxv

Mah Zurhxf Dtahxv Chehf

1. Lehxf Lahf Zurhf
2. Lahf Zurh Tseehf
3. Tseehf Lahf Neh
4. Neh Sawv Mah
5. Sawv Mah Zurhxf
6. Zurhxf Chjehxv

Zurhxf Shawv

1. Lehxf Lahf Zurhf
2. Lahf Zurhf Tseehf
3. Tseehf Lahf Neh
4. Lahf Neh Tauhf
5. Tauhf Sawv
6. Sawv Mah
7. Mah Zurhxf
8. Zurhxf Shawv

Zurhxf Chjehxv

(Choeuh Jurhv Goohv)

1. Lehxf Lahf Tseehf
2. Tseehf Lahf Neh
3. Neh Lahf Tauhf
4. Tauhf Sawv Mah
5. Sawv Mah Zurhxf
6. Zurhxf Chjehxv

Mah Zurhxf (Hkahv Boeuhf)

1. Lehxf Lahf Tseehf
2. Tseehf Lahf neh
3. Neh Lahf Shawv
4. Shawv Mah
5. Mah Zurhxf


6. Zurhxf Chjehxv

Hurh durhv auhf haw nahf, Mah Zurhxf goohv durhv, yawv hah urh ahv poeuhv durhv auhf, Mah Zurhxf auhf neh lahv dtahxf paw, ngahv jayv guuh bpahxf loohxv urh meh. Ahv guruh rgahv neh guuh urhv tsahv urh mahv seehv. Ah chjooxf tsayf mmf haw urh tsahv meh.

Ahf kurhf urh tsuuhxv auhf haw ghkohxv ngeh, ahf dauhv beh ngeh ah duuh nehv-ehf mahv doohf ghkawxv, Ohf Toeuhv Loeuh auhf neh,Dzoeuhv Tauhv Pauhv auhf gkurhxf neeh pahf doohf layf urh meh. Turh meehf neh, "Ahf Myauhf" lahv dtahxf tsehxf durhv ahv, Sauhv pahv urh ahf myauhf ghkawxv pyurhvx nyah urh meh. Ahf kurhf urh ahf dauhv beh urh tsuuhxv durhv:

1. Mmv Mahxv
2. Mmv Rgauh
3. Rgauh Nayv
4. Nayv Boehxf
5. Tseehf Myawf
6. Ohf Toeuhv Loeuh

Lahv ohxf tsehxf durhv ahv, Ohf Toeuhv Loeuh auhf neh, Dzoeuhv Tauhv Pauhv auhf gkurhxf neeh ah duuh ahv kahv lohvx-ehf



pahf guuh dtahxv gahf, yah mawf urh meh. Smmf Meehf Ohf mahv guuh dtahxv neeh rgeh urh ahv, ahv jayv meehf neh mahv seehv jayv meh.

Ahf kurhf goohv ahv mmv mahxv auhf neh guuh gahf neh, Smmf Meehf Ohf jeehf mahv auhf urh meh.

Byehxf zauhv urh tsuuhxv durhv ahv, ahv guruh gahf zmm urh mahv seehv. Seehv nyah urh teehv hmvv ah, uuhf jurhv jurhv lay hawf urhf chjooxv lawf gawxf auhf tsawf hahv tsehxf mawxv neh jawf, Byehxf Zauhv urh tsuuhxv guuh hawf, beeh chaw bah nehv lay lahxv lehf hah shahf neh tsehxf urh meh.

I. Ahv Kahv Urh Tsuuhxv

- 1. Mmv Mahxv**
- 2. Mmv Rgauh**
- 3. Rgauh Nehxv**
(Nehxv Tsuuhxv)
- 4. Nehxv Yawxv**
(Nehxv Tsuuhxv)
- 5. Yawxv Zurhxf**
(Nehxv Tsuuhxv)

II. Byehxf Yauhv Tsuuhxv

- 1. Uuhf Lauhv**
- 2. Lauhv Dohf**
- 3. Dohf Maw**
- 4. Maw Gahv**
- 5. Gahv Dzauh**

- 6. Zurhxf Tohf**
(Nehxv Tsuuhxv)
- 7. Tohf Mah**
(Nehxv Tsuuhxv)
- 8. Mah Yawf**
(Nehxv Tsuuhxv)
- 9. Yawf Nehxv**
(Nehxv Tsuuhxv)
- 10. Nehxv Beh**
(Nehxv Tsuuhxv)
- 11. Beh Smmf**
(Nehxv Tsuuhxv)

- 6. Dzauhf Ghoehv**
- 7. Ghoehv Mah**
- 8. Mah Yawf**
- 9. Yawf Nehxv**
- 10. Nehxv Beh**
- 11. Beh Smmf**

- 1. Smmf Meehf Ohf**
2. Ohf Toeuhv Loeuh
3. Toeuhv Loeuh Dzmm
4. Dzmm Mawv Yehf
5. Mawv Yehf Chah
6. Chah Teehv Seehv
7. Teehv Seehv Leehf
8. Leehf Pawv Behxf
9. Pawv Behxf Oohxf
10. Oohxf Nyohv Zahv
11. Nyohv Zahv Tsawf

12. Tsawf Mawv Oeuhf
13. Mawv Oeuhf Jayv
14. Jayv Tauhv Pauhv
15. Tauhv Pauhv Mauhf
16. Mauhf Hkawv Tauh
17. Hkawv Tauh Jayv
18. Jayv Lay Nyawf
19. Nyawf Cheehf Lahxv
20. Lahxv Tauhf Boeuhv
21. Tauhf Boeuhv Soeuhxf
22. Boeuhv Soeuhxf Lehxf

Boeuhv Soeuhxf Lehxf auhf neh nahf nyeehv lahxv mah rgawv ee hf urh meh.

1. Lehxf Lahf Zurhf
2. Lehxf Lmmf Bohf

Jawf Bpohxf Goohv Urh Tsuehxv

23. Lehxf Lmmf Bohf
24. Bohf mawv Bpohxf
25. Maw Bpohxf Teehf
26. Teehf Sahf Byurhf
27. Byurhxf Mah Dzauhf

28. Dzauhf Jurhv
29. Jurhv Jawf
30. Jawf Bpohxf
31. Bpohxf Sheh xv
32. Sheh xv Yohf
33. Yohf Pyayxf
34. Pyahxf Choohv
35. Choohv Rgah
36. Rgah Mauhf
37. Mauhf Chjeehxf
38. Chjeehxf Toohv
39. Toohv Gay
40. Gay Zeeh xv
41. Zeeh xv Kawf
42. Kawf Hkauh
43. Nyohv Zauh
44. Zauh Shohf
45. Shohf Zehf
46. Zehf Zauh
47. Zauh Dzehv
48. Dzehv Buuh
49. Buuh Dzohxf
50. Dzohxf Lahxf
51. Lahxf Muuhv